

TA PARCE CU NO TIN SERIEDAD CERCA POLITICONAN NA ARUBA

ORANJESTAD (AAN) Durante campaña electoral manera bijnan brabo politiconan tabata pasa di porta pa porta rond Aruba, pa asina trata di convence pueblo pa vota pa nan.

Placa a ser parti na grandi y promesanan grandi a ser haci atrobe pa asina haya voto pa por bolbe sinta riba e stoel dushi cu ta duna un salario gigantesco na mandatarionan.

Pais Aruba a perde un gran parti di su autonomia y awor ta puestu di Gobernador di Aruba tambe ta core peliger, cu esaki ta bay cay den man di Hulanda.

No tin un yiu di tera cu ta bon educa y bon prepara pa bira Gobernador, cu ta un Hulandes mester bay sinta riba e puestu di gobernador di pais Aruba?

Esaki ta loke algun politico y pueblo tabata puntra ayera y durante dianan cu a pasa pasobra keto bay no tin claridad riba loke ta bay pasa cu e puestu di Gobernador

No tin nada contra cu si den caso cu no por haya un yiu di tera pa asumi e puestu di Gobernador, pa pone un Hulandes Europeo, pero no ta Hulanda mes a caba di degradar Arubianonan na nivel di ciudadanonan di segunda clase cu nan ley di Inburgering na Hulanda?

Hulanda ta degradando Arubianonan tambe na un nivel cu nan no por asumi e puestu di gobernador?

E Hulandes cu posiblemente ta bay asumi puestu di Gobernador a pasa curso caba pa e por ser acepta na Aruba?

Si ta uno cu a biba hopi aña na Aruba caba no tin problema, pero si ta un Hulandes cu pa prome biaha ta bin aki, ta kico e sa di e pueblo di Aruba y nos cultura y normanan?

Un Hulandes Europeo lo defende interesnan di Aruba y su pueblo mescos cu un Arubiano lo haci riba e puestu di Gobernador?

Ta dificil pa kere cu no tin Arubianonan pa asumi e puestu di Gobernador y ta pesey Ministro Glenbert Croes ayera den un declaracion fuerte, a cuestiona loke ta pasando cu e funcion di Gobernador.

Segun Ministro Glenbert Croes, den Consejo di Minis-

tro a ser palabra y acorda cu e Gobernador actual señor Olindo Koolman ta e persona cu mester bin na remarke pa haya un di dos periodo como Gobernador di pais Aruba.

Glenbert a bisa bon cla ayera, cu e no ta compronde cu awor wega ta worde hunga cu e posicion di Gobernador y e tabata reta otro ministronan y politiconan na Aruba pa para y defende interesnan di e pueblo di Aruba.

Aki un biaha mas Glenbert Croes ta demostra cu e ta un yiu di tera cu ta para firme ora cu ta trata interesnan di Aruba su pueblo y mescos cu su tata Betico, Glenbert no tin miedo pa bisa Hulanda e berdad.

Mescos cu Betico a lanta para y bisa e tempo ey ta basta y cu Aruba mester ta baas den su mesun cas, mescos Glenbert Croes tambe a lanta para y bisa cu ta Aruba mester determina su autonomia y no Hulanda.

Awor poco poco pueblo ta bin realiza pakico tanto investigacion mester a worde

haci contra Ministro Glenbert Croes pasobra Glenbert na mas cu un ocasion a lanta para y bisa Hulanda: NO POR!!

Glenbert no ta manera e entreguistanan cu ta sigui duna Hulanda numa, basta nan por keda na mando y ta pesey Hulanda ta sostene e entreguistanan cu no sa mas kico nan mester sigui entrega na Hulanda.

E cuestion di Yamantota tambe ta algo cu Ministro Glenbert Croes no a laga drumi pasobra ayera mes depues cu DIARIO riba peticion di pueblo di Aruba a exige claridad encuanto e status di seroe Yamanota, e Ministro di Transporte y Comunicacion a manda un carta pa director di Setar.

Den su carta manda pa e director di Setar, señor Ludwig Jansen, e Ministro oficialmente como e mandatario responsabel pa Tele Comunicacion y den e caso aki seroe di Yamanota a manda existi claridad encuanto e KB riba Yamanota.

Seriedad ta leu cerca mayoria politico na Aruba y te awe ta ministro Glenbert Croes tabata e persona mas critica y ataca durante ultimo tres aña pa e simple hecho cu e tabata tin e curashi mescos cu su tata Betico, pa para colonialismo na Aruba.

Unda e ministronan y parlamentarianan di partido berde, oranje y geel (cu excepcion di uno) a keda pa defende e puestu di Gobernador di Aruba, pa esaki keda den

man di Aruba?

Seriedad di un politico mester ser demostra den temporada di crisis tambe y mirando cu actualmente tin un sorto di crisis debi cu keto bay no tin gobierno nobo, Ministro Glenbert Croes ta e unico cu tin e curashi pa habri su boca y bisa cosnan manera nan ta y e no ta sconde tras e excusa fofa cu formacion di gobierno mester tuma lugar prome cu algo por worde haci!!

VETERINARIO TA ALERTA PUBLICO RIBA REMEDINAN HORTA RIBA CAYA

ORANJESTAD (AAN): -- Oficina di veterinario na Pastoor Hendrikstraat 44 na San Nicolas a haya bishita di ladronnan na comienzo di aña.

Den un carta pa redaccion di DIARIO, veterinario Pieter Barendsen ta bisa cu esaki no ta e prome vez cu ladronnan a drenta den e oficina.

E biaha aki sinembargo, ladronnan a hiba e stock di remedi di e veterinarianan cu nan y no a laga nada pa e docternan di bestia traha cu

ne.

Den e carta, señor Barendsen ta avisa publico cu e remedinan cu a wordo horta no por wordo usa, si no ta bao guia di un veterinario.

E ta alerta tur hende pa no tuma o cumpra remedi sospechoso di ningun persona.

E veterinario ta pidi esnan cu por tin informacion tocante e ladroncia den e consultorio o encuanto personanan cu ta trata pa bende remedi pa animal o shampoo di cacho o pushi, pa contacte na telefon 821720.

